

A reconoce 6 baluarte musical di nos Pais durante un bunita evento

Diamars 22 di november durante un evento special den Sala di John F. Kennedy Education Center, ministerio di cultura a organisa un bunita evento caminda a reconoce 6 baluarte musical di nos Pais Aruba.

Musica ta e idioma universal y sin musica y cantante no tin obra musical. Durante su discurso Minister Maduro a trece dilanti cu musica ta hopi importante den nos bida. E ta e idioma universal di nos alma cu ta genera sentimento y tanta emocion. Musica ta manera magia, e ta haci nos recorda personanan of momentonan unico. Musica tin e poder inmenso di conecta hende di diferente cultura y uni comunidad.

Y e musico y cantante ta esencial pa comparti e bunita regalo di musica, pasobra sin musico y cantante no tin obra musical. Nos Pais aumke e ta chikito na tamaño, e ta grandi na talento. Esey ta danki na boso musico y cantante cu a sa di deleita nos Pais cu boso talento unico y impresionante.

Victor Camacho

Sr. Victor Nicolas Camacho, ta pianista cu a representa Aruba den varios pais internacionalmente y tambe a toca deleitando nos bishitantenan di exterior den varios hotel local. Actualmente e ta solo pianist na Riu Palace Hotel. Sr. Camacho tambe a composita y aregla obranan pa Voz-I-Landia Escorial y a produci varios disco honorando sr. Rufo Wever y sr. Padu Lampe tur dos den feliz memoria. Victor tambe a toca hunto cu Savaneta Steelpan na Cas di Cultura na aña 1965 pa nos ex Reina Juliana y Prins Bernard tur dos den feliz memoria.

Hyacintho Giel

Sr. Hyacintho (Casin) Giel, como musico ta tocado di guitarra y piano. Y como cantante, e ta cantante di ranchera y bolero. Casin a lanta su mesun banda 'Casenger Sweet Band' y ta miembro y cofundador di varios banda na Aruba manera Super Combo Casino y Triple S. Ademá di ta miembro y co-fundador, Casin ta compositor di mayoria di e cancionnan di Doble Sabor. Casin den temporada di carnaval tambe ta participa como compositor den Festi-



val di Tumba. Casin Giel: pa semper Aruba su prome Rey di Tumba.

Felix Hoek

Sr. Felix (Chucho) Hoek, a wordo representa pa su sra. Gina Werleman. Chucho como musico a aregla y compone pa varios cantante y banda. Chucho ta conoci tambe pa aregla y compone jingle pa varios organisacion y compania. Chucho tabata integrante y a dirigi diferente banda musical y a acompaña varios banda den festival y conciertonan. Chucho tabata docente di guitarra clasico y electronico y bajo. Tambe, el a duna les di teoria di harmonia, areglo y solfeo y ta actualmente e director di Stichting Arubanse Muziek-school/School di Musica Rufo Wever.

Roland Kock

Sr. Roland Nariciso (Chicho) Kock, su carrera musical ta como tocado den banda y steelband. Chicho ta toca varios instrumento manera bajo, guitarra, drum, conga y timbal. Un musico cu a toca den banda, na hotel y hasta den steelband. El a toca cu hopi cantantenan renombrá local y internacional. Tambe Chicho tabata toca bajo y canta den coro di Sensacion del Caribe.

Cesar Olarte

Sr. Cesar Olarte ta bini di un generacion di famianan musical y a crece den ambiente di musica ranchera hunto cu e grupo Mariachi Perla de Aruba. For di edad hoben

Cesar a domina genero di musica manera R&B urbano y a deleita publiconan local y internacional. Cesar a gana varios premio entre otro un Grammy Latino cu e produccion di Chichi Peralt y Son Familia.

Ivan Quandus

Sr. Ivan Quandus, tocado di guitarra, steelpan y guitarra bass. Ivan hunto cu sr. Carlos Bislip, sr. Delbert Bernabela ta forma parti di trio di jazz, the Aruba Art Ensemble. Ivan a toca tambe na diferente jazz festival local, den region y internacionalmente. Ivan a forma parti como basista di varios banda cu a duna presentacion den hotelnan local.

Reconocemento

E mandatario a expresa palabrá di danki na e musiconan pa ta digno embahador di nos idioma Papiamentu y danki tambe pa expone nos cultura y promove number di nos Pais Aruba den exterior por medio di nan talento musical. Victor, Casin, Chucho, Chicho, Cesar, y Ivan, un danki di carason pa boso tremendo contribucion na cultura di nos Pais tabata palabranan di Minister Xiomara Maduro.

Alabes el a pidi pa Dios sigui bendicir nos musiconan cu hopi talento mas pa por sigui crea mas obranan musical, comparti nan creatividad, talento y obra y sigui contribui na nos cultura musical y continua representa nos Pais Aruba riba tarimanan internacional.

